

Nunatta Karsiata 2016-imut naatsorsuutaasa akuersissutigineqarnerat pillugu Inatsisartut aalajangiiffigisassaattut siunnersuut

(Aningaasaqarnermut Akileraartarnermullu Naalakkersuisoq)

Akissuteqaat

(Aningaasaqarnermut Akileraartarnermullu Naalakkersuisoq)

2. Siullermeerneqarnera

Naalakkersuisut sinnerlugit Kukkunersiuinermut Ataatsimiititaliap Nunatta Karsianut 2016-imut naatsorsuutit suliarineqarnerannut atatillugu sukumiisumik sulisimaneranut qujaniarpunga.

Naalakkersuisut nuannaarutigalugu paasivaat ataatsimiititaliaq isumaqatigiilluni naatsorsuutit eqqortuusutut isumaqarfigimmagit, akuersissutigineqarnissaallu inassutigalugu.

Kukkunersiuinermullu Ataatsimiititaliaq kukkunersiuisumit avataaneersumit Namminersorlutik Oqartussaata naatsorsuuserineranni pitsanngoriartorfiunera pillugu paasitinneqarsimammat Naalakkersuisut aamma nuannaarutigaat.

Kukkunersiuinermut Ataatsimiititaliap immikkut naammaginatippaa Sanaartornermut Iluarsagassanullu Aningaasaateqarfik pillugu nassuiaat Nunatta Karsiani naatsorsuutininut allanut ilaatillugu piffissaq eqqorlugu saqqummiunneqarmat.

Kukkunersiuinermut Ataatsimiititaliap erseqqissarpaa qinnuiginneqqinnernik ukiut siuliineersunik suli ammasunik suli peqartoqarmat. Pissutsit tamakku ilaat suliassaqaarfinnut allanngoriartorfiusunut tunngapput, soorlu aningaasaqarnermut aqutseriaatsimik nutaamik (ERP) atuilersimaneq, tassuunalu erseqqissarniarneqarpoq suliffeqarfiup iluani nakkutilleeriaatsit aamma Namminersorlutik Oqartussani aningaasaqarnermut aqutsinerup nukittorsarnissaanni anguniagaqarnermut massakkut qanoq pingaaruteqartigineri. Kukkunersiuinermut Ataatsimiititaliap peqatigitillugu malugeqquaa ERP-mik atortoqarneq aqqutigalugu pissutsit tamakkerlugit ukiumiit ukiumut aaqqiivigineqarsinnaanngimmata, tassami ajornartorsiutinngortut arlallit ukiut arlallit atorlugit namminneerlutik iluarsiartulissammata.

Naalakkersuisut Kukkunersiuinermut Ataatsimiititaliap qinnuiginninnerit suli suliarai, suliassaqaarfimmilu pisariaqartinneqartumik paasiniaasoqarnissaa sulissutiginiarlugu.

Tapiissutininut aaqqiinernut tunngatillugu sunniutaasut ilisimasanillu avitseqatigiittarnerit uuttuiffiginissaannut qarasaasiakkut ilisimasatigut periutsit atorneqalernissaat pillugit ilisimatinneqartarnissamik Kukkunersiuinermut Ataatsimiititaliaq kissaateqarsimavoq. Qarasaasiakkut ilisimasatigut periutsit qanoq atorneqartiginersut, taakkulu ulloq manna tikillugu qanoq misilittagaqarfiutiginersut pillugit Kukkunersiuinermut Ataatsimiititaliamit ilisimatitsissummik suliaqartoqarumaarpoq.

Taamatut oqaaseqarlunga siunnersuut Inatsisartunit naggammik aappassaaneerneqarnissaa suliassanngortippara.